

Fundacion Pa Nos Comunidad a presenta su raport 2013

ORANJESTAD (AAN): Director di Fundacion pa Nos Comunidad, Indra Stamper a presenta raport pa loke ta trata aña 2013, pa asina esnan cu ta aporta na e fundacion haya mas informacion na unda exactamente esaki a wordo usa.

Sra. Stamper a bisa cu ta hopi importante pa duna pueblo informacion riba cifranan.

Nan a cuminsa presenta esaki apenas 1 aña y mey pasa, y ta intencion pa sigui cu esaki tur aña.

Pa loke ta trata e raport, e directora a indica cu 2013 nan a registra un total di 1.620 famia. Si bo calcula esaki den cuatro aña di existencia di e fundacion, e ta alrededor di 400 famia pa aña cu a registra den e fundacion. E total di persona cu e fundacion a duna asistencia tabata 4.472 persona.

E motibo di con nan kier



presenta e cifranan, ta pa gradici esnan cu ta aporta na Fundacion pa Nos Comunidad, pa asina nan por cumpra cuminda, y yuda famianan den necesidad. Asina por demostra cu e placa of ayudo a bay pa un cantidad asina grandi di persona.

Compara cu aña anterior, kiermen 2012, na unda nan a registra 1.290 famia y pa loke ta trata cifra di persona individual tabata 3.322 persona. Esaki ta un aumento di 26 por ciento den cantidad di famia y 35 por ciento den cantidad di persona individual, compara cu cifranan di 2012. Sra. Stamper tambe a agrega cu un 36 por ciento di tur persona ta hende homber, y 64 por ciento ta hende muher, como tambe 37 por ciento di e total ta mucha.

Aunke 23 por ciento di persona cu ta wordo yuda tin un trabao, e salario no

ta yega pa cubri tur gasto di luna.

Un di e preguntanan mas frecuente ta si e famia of personanan cu ta haya ayudo di Fundacion Pa Nos Comunidad ta local of extranhero, y nan a indica cu 62 por ciento ta local.

Na 2013, e fundacion a entrega 2.424 pakete, den comparacion cu 2012, nan a haci entrega di 2260 pakete na famianan.

Sra Stamper a indica cu si cualquier persona, instancia, negoshi tin pregunta, idea, of algo cu ta importante pa e fundacion informa pueblo di Aruba, por haci yama of pasa libremente na oficina.